

مارننگ گو جری نیوز بلیٹن مورخہ 01 فروری 2026

یوہ آکا شوانی جموں ہے محمد امین انجم تیں خبر سُنو۔

Nirmala-Budget

وزیر خزانہ نرملا سیٹھا رمن اج لوک سبھا مانہ مرکزی بجٹ 27/2026 پیش کریں گی۔ لوک سبھا مانہ بجٹ پیش کرن تیں بعد اس غی نقل راجیہ سبھا مانہ ٹوری جائے گی۔ وزیر اعظم نریندر مو دی غی تیجی بار سرکار بنن تیں بعد یوہ تیجو بجٹ وے گو۔ بجٹ تیار کرن تیں پہلاں وزیر خزانہ نے بشمول ماہرین تے ماہر اقتصادیات، تاجر تے یونینز، تعلیم تے صحت سیکٹر غا نمائنداں، کئی متعلقین نال بجٹ تیں پہلاں غا صلاح مشورہ کیا۔

JK Budget Session Assembly

پلک تیں شروع ہون آلا جموں کشمیر قانون ساز اسمبلی غا بجٹ اجلاس غا سلسلہ مانہ تمام انتظامات کر لیا گیا ہیں۔ اس ضمن مانہ حکام نے تمام ضروری انتظامی تے حفاظتی تیاریاں مکمل کر لی ہیں، تا نچے ہموار طریقہ نال اجلاس منعقد کرایو جا سکے۔ اس سلسلہ مانہ اسمبلی کمپلیکس غے آسے پاسے حفاظت تگڑی کر دی گئی، جد کہ صحت، صاف صفائی تے ٹرانسپورٹ انتظامات ناہے وی حتمی شکل دی گئی ہے۔ اس بجٹ اجلاس مانہ سرکار غی پالیسیاں، ترقیاتی ایجنڈا تے یوٹی واسطے مالی منصوبہ بندی غا ضمن مانہ اہم تبادلہ خیال دیکھو جانو متوقع ہے۔ عہدیداراں نے بھروسو ظاہر کیو ہے جے بجٹ اجلاس فائدہ مند طریقہ نال پیش کیو جائے گو۔

Kishtwar Op

کشتواڑ غے اندر جیش محمد غا 3 دہشتگرد مار مکان واسطے اک سانجھی کارروائی چلائی گئی ہے۔ مہارا نمائندہ نے رپورٹ ٹوری ہے جے ضلع غا برفیلا علاقہ مانہ کئی تیہاڑاں تیں کارروائی چل رہی ہے۔ اس سلسلہ مانہ کل ضلع غا ڈولگام علاقہ مانہ دہشت گرداں نال آمنو سامنو ہوئے تے اس راہ گولی بازی غو تبادلہ ہو گیا۔ رپورٹ مانہ دسیو گیو ہے جے 1 دہشت گرد زخمی ہون غو یقین ہے جد کہ کارروائی تے گھیرا بندی چل رہی ہے۔

Dy CM Nowshera

نائب وزیر اعلیٰ سریندر کمار چودھری نے کل این ایچ 144 اے تیں نو شہرہ قصبہ تک جان آلی سڑک غی تعمیر تے بہتری بارے چل رہیا کم غو معائنو کیو۔ تے معیار ویلے سرپیش رفت اور لوکاں واسطے رابطہ بہتر بنان غی یقین دہانی کرائی۔ انہاں نے مین سڑک کوٹ کبو بریوی تک جان آلی سڑک غی بہتری غو نی پتھر رکھو کالاکوٹ راجوری مانہ رکھیا گیا اس نی پتھر غو مقصد لوکاں واسطے آسان رابطو بنانو ہے۔ اس موقع ور بولتاں وان نائب وزیر اعلیٰ نے کہو جے سرکار سڑک بارے بنیادی ڈھانچو مضبوط کرن اور دور دراز گرائیں علاقہ مانہ رابطو بہتر بنان غا وعدہ غی پابند ہے۔

Itoo Surprise Visit

صحت تے طبی تعلیم غی وزیر سکینہ ایتو نے کل گو رنمنٹ میڈیکل کالج جموں غو اچانک معائنو کیو تے مریض مرکوز سہولیات غی تفصیلی جائزو لیو۔ اُنہاں نے ایمرجنسی اور وارڈاں غے نال نال تشخیص یونٹاں تے دوجا شعباں غو جائزو لیو تے دوائیاں، سازو سامان غی دستیا بی اور صاف صفائی تے عملہ غی حاضری غو جائزو لیو۔ وزیر موصوفہ نے مریضاں تے تیمارداراں نال وی گل کی تے طبی دیکھ بھال غا سلسلہ مانہ خدمات با رے رائے حاصل کی۔ اس موقع ور گل کرتاں واں محترمہ ایتو نے زور پایو جے سرکاری ہسپتالاں ور بھروسو اُن غا برتائو ہمدردی تے ڈاکٹراں اور نیم طبی عملہ غا پیشہ وارانہ طریقہ ور منحصر کرے۔ وزیر صحت نے ہسپتال انتظامیہ نانہ ہدایت کی جے ویلے سر طبی دھیان غے نال نال مناسب حفظان صحت برقرار رکھنو یقینی بنایو جائے تے تمام سطحاں ور مریض غی عزت برقرار رکھی جائے۔

Ravi Das Jayanti

اج مُلک پھر مانہ سنت روی داس غو جنم تہاڑو روی داس جینتی منائی جا رہی ہے ویں 14 ویں صدی غا سنت تے شمالی بھارت مانہ بھگتی تحریک غا بانی تھا۔ لیفٹنٹ گو رنر منوج سنہا تے وزیر اعلیٰ عمر عبداللہ نے لوکاں نانہ مبارکباد دیتاں واں گرو روی داس جی غو بروبری، سماجی انصاف تے عالمی بھائی چارہ غو پیغام اُجاگر کیو۔

Weather

جموں کشمیر مانہ 10 فروری تک موسم عام طور ور خشک رہن غو امکان ہے، تے اس دوران کسے وی بڑی بارش یاہ برفباری غی پیشنگوئی نہیں ہے۔ حالانکہ یوٹی پھر مانہ اج ہلکی تیں درمیانہ درجہ غی بارش تے برفباری غے نال کئی جگہیں تیز ہوا چلن غو امکان ہے۔ اسے راہ 2 فروری غی رات غے دوران اور 3 فروری بعد دوپہر کئی جگہیں ہلکی بارش یاہ برفباری ہو سکے۔ محکمہ موسمیات نے کہیو ہے جے 4 تیں 6 فروری بشکار جموں کشمیر مانہ خشک موسم غی پیشنگوئی ہے۔

اس غے نال ہی خبراں غو یوہ بلیٹن ختم ہوؤ۔